

"EL PRINCIPE HILDWARD CROES"

ULTIMO GIRANAN Y FUTURO DESARROYONAN DI GRUPO 4.40

Despues di un exitoso gira den Estados Unidos, hunto cu Juan Luis Guerra y su 4.40, Hildward ta tumando un "rust" riba su isla Aruba. Na Estados Unidos nan a bishita 20 estado, caminda tur nan conciertonan tabata practicamente "sold out". Na Hollywood California den e luhoso Universal Amphitheater, e dos anochinan di nan concierto tabata "sold out". Pa dos anochi nan a presenta dilanti ocho mil persona. Tambe nan a hospeda den Universal studio, caminda estrellanan di cine ta hospeda pa traha pelicula. Na Hollywood California tabata un experiencia inolvidable, algo increible, y ta manera bo ta den un otro Mundo segun Hildward. Den e gigante Madison Square Garden nan a presenta cuater anochi, di cual cada anochi tabata tin mas di 35 mil persona. Cu e super exitoso gira aki, Juan Luis y su grupo 4.40 a demostra cu nan ta hopi popular den Estados Unidos, caminda un record total di mas o menos 200 mil persona a bishita nan conciertonan. Ta masha poco grupo latino por logra exitonan grandi asina na Estados Unidos. Pa motibonan cu Juan Luis Guerra y su grupo ta hopi solicita, y practicamente henter aña '91 nan tabata den giranan, ainda nan L.P y C.D no ta full cla ainda pa ta riba mercado. Actualmente Juan

Luis Guerra y algun integrante ta grabando den tres diferente studionan, cual ta EMCA na Republica Dominicana, Powerstation y studio 4.40 na New York. Nan ta grabando den fasenan cual e parti ritmico ta cuminsa prome, sigui pa brass, saxofon, teclado y e canto mes semper ta keda e ultimo. Hildward ta sperando riba su call pa asina e bay graba su parti cual ta teclado. Studio 4.40 na New York antes tabata yama Sound Ideas, caminda tur e artistanan latino tabata graba. E ultimo l.p. di Ruben Blades "Caminando" a wordo graba den e studio aki. Despues di completa e fase final cual ta e mixing, caminda Hildward tambe lo bay tin su parti, e l.p. y c.d. lo ta riba mercado. Segun DEN AMBIENTE por a compronde cu e produccion nobo aki lo bay dal duro atrobe, mirando cu e profeta Juan Luis Guerra ta tumando tur su tempo pa bin cu algo diferente y pegahoso. Mientras cu e c.d. y l.p. ta wordo imprimi, e grupo ta programa pa por lo menos 50 concierto den e lunanan di Maart, April y Mei. Nan lo bishita paisnan Centro Americano y Sur Americano. Tambe tin giranan programa pa bishita paisnan Europeo, manera: Hulanda, Belgica, Alemania, Francia y Inglaterra. Esakinan ta camindanan cu e ultimo l.p.

"BACHATA ROSA", a causa furror especialmente e exitoso cancion "BURBUJAS DEL AMOR". Tambe tin plannan serio pa bishita Hapon y otro paisnan Aziatico den futuro. Segun rumornan cu nan lo ta na Aruba dia 4 di juli pa ROYAL CABAÑA CASINO. Pa e aña aki cu Dios kier DEN AMBIENTE lo bay ta invitado atrobe di e popular grupo aki via Hildward pa cubri un gira di nan na Hulanda, caminda hopi Arubianonan y Antianonan ta sperando riba e famoso grupo aki. Ya caba tin promocionan na television pa tur nan conciertonan na terra friu. DEN AMBIENTE tur na "FRIO FRIO" den "BURBUJAS DEL AMOR" na madre patria, keda PENDIENTE !!!



Hildward hunto cu algun intergranenan di grupo 4.40, subiendo riba stage pa bay duna un concierto di dos ora y mei. Prome cu e concierto aki nan a "soundcheck" pa tres ora largo.




Riba grafico nos por aprecia e talentoso musiconan Arubiano: Albi Navas, Gus Genser, Reno Steba, Hildward Croes, Ivan Jansen y Nidia Emerencia. Aki nan nan tabata preparando pa e "SUPER ROCK FUSION PROJECT", na aña 1984.

BLUE WAVE

Yen di ambiente
y gozo!!

Bin baila
tur e
Hitnan di
Carnaval
di
Claudius
y
su grupo
Oreo



OTRO SIMAN
ENTREVISTA CU
CHICK COREA

Pa motibonan imprevisto DEN AMBIENTE mamera a priminti no por a brinda su fiel lectoran e entrevista cu e mundial famoso pianista di Jazz. Pa orto siman DEN AMBIENTE lo bin cu e interesante entrevista aki caminda Chick ta laga sa cu e ta hopi intersa pa ta den Aruba Jazz & Latin Festival, y tambe cu e ta masha intersa den musica Caribeño y e ritmo tumba. KEDA PENDIENTE !!!